



Il Chor viril rumantsch da Berna survegn rinforz sonor da chantadurs da Lucerna e Zug.



Il Chor maschadà grischun da Berna sut la batgetta dad Eva Maria Wüthrich.

FOTOS C.CADRUVI

Ils uffants da Sumvitg – l'attracziun en il casino a Berna

«Da cumpagnia» cun RTR en la Bassa

DA CLAUDIA CADRUVI / ANR

■ Radiotevisiun Svizra Rumantscha (RTR) ha envidà ed ina bella rotscha da Rumantschs u amis da la quarta lingua è vegnida. En il casino a Berna hai dà chant, spaisa e la chaschun d'inscuntrar enonuschents. «Da cumpagnia» ha gi lieu la sonda per la segunda giada en la Bassa. Il directur da RTR Mariano Tschuor ha engrazià per la simpatia ch'ìls Rumantschs da la Bassa demussian sco auditurs ed aspectaturs envers il radio e la televisiun. Suenter il bainvegni ha la moderatura Maria Victoria Haas accompagnà atras il program ed ha fatg intervistas cun dirigents, chantadurs e musicists.

Bellas vuschs da Sumvitg

L'applaus il pli chaud han obtegni las mattas ed ils mats da la vischnanca da Sumvitg. Cun «La canzun dil bau» u «Las paterlieras» ha il chor d'uffants conquistà la simpatia dal publicum da Berna. Ils uffants e giuvenils han chantà uschè fin e

schuber ch'i tunava mintgant sco ord ina bucca.

Flavia Hublard, la dirigenta dal chor, ha ditg ch'ella saja fitg cuntenta cun ils uffants che hajan tschaffen da chantar. Ins haja fin uss mai gi problems da chattar novs commembers per il chor. Sco proxim project saja planisà in disc compact cun chanzuns da Nadal. Quel registreschian ins ensemen cun in auter chor d'uffants.

Trais chors da la Bassa

Er ils chors da la Bassa èn sa preschentads cun produczions persaventas, malgrà ch'els han tuts da sbatter cun chattar novs chantadurs. Sco emprim è il Chor maschadà grischun da Berna stà en roda. Ins chantia oravant tut chanzuns rumantschas, ha relatà la dirigenta Eva Maria Wüthrich. Ma ins haja era chanzuns talianas en il repertori. Il chor maschadà exista dapi il 1948 e chanta savens en chasas da vegls e tut tenor chaschun en chasa federala.

Sco segund è il Chor viril rumantsch

da Berna vegni sin tribuna e plirs chantadurs da Lucerna e Zug han gidà a rinforzar las produczions. In chantadur tudestg da quest chor ha manegià per spass en l'intervista cun Victoria Haas ch'ìls «Bernais chantan cun il cor, ed ils Grischuns cun l'olma». Pli tard ha in chantadur rumantsch pretendi ch'ìls chors tudestgs chantian cun il chau ed ils chors rumantschs cun il cor. Las duas «prezensiuns» n'han ni pudì vegnir verifitgadas u refutadas, pertge chors tudestgs n'èn betg passads si.

En mintga cas han ins senti l'engaschi e la premura per il chant – gist era tar il Chor viril rumantsch da Lucerna e Zug. Chantar muntia adina era star da cumpagnia cun camerats e cumpogns, ha ditg Corsin Derungs, president dals chantadurs da Lucerna e Zug. Jürg Wasescha vegn mintgamai aposta da Tavau en la Bassa per direger ils chantadurs rumantschs da Lucerna e Zug.

In auter stil da chant rumantsch

In'otra sort musica han Bianca Mayer e Roland Vögli purtà sin tribuna. Ils dus musicists ladins han l'emprim chantà e sunà solo – Mayer al clavazin e Vögli a la ghitarra – e suenter purschi ina produczion da cuminanza.

Avant che servir la tschaina cun spezialitads grischunas ha RTR mussà films curts or da l'archiv. L'occurrenza da la sonda passada ha RTR organisà en colavuraziun cun l'Uniun dals Rumantschs da la Bassa (URB).

Forum davart la lingua cuminaivla en scola

Tge curra e passa puncto rumantsch grischun en scola? Er ils Rumantschs da la Bassa s'interesschan per la dumonda. Perquai ha l'URB organisà la sonda suentermezdi in forum da discussiun en il casino a Berna. Urs Cadruvi da la Lia Rumantscha, Maria Ca-

druvi da «Pro rumantsch» e Gian Carlo Conrad, magister en Val Müstair, han prendi plaz al podi. Dals adversaris da la lingua cuminaivla en scola n'è naging stà pront da vegnir a Berna. La discussiun è tuttina stada plain variaziun – era gazia a la participaziun dal public.



La moderatura Maria Victoria Haas discurra cun il president da l'URB Jon Carl Tall.



Mariano Tschuor, directur da RTR, fa bainvegni.



Guitarra e vusch – Roland Vögli, chantatur ladin.



Il pli grond applaus hai dà per il chor d'uffants da la vischnanca da Sumvitg.



Bianca Mayer porta in auter stil da musica sin la tribuna dal casino.